

Un comienzo pa crea un actividad dedica na cultura tipico di Aruba



STA. CRUZ -- Diferente epoca Cultural

Si nos haci un recorida durante un año di algun actividad cultural, sea nan ta institucional of no, nos ta habri año cu celebracion di "Tres Rey", caminda tur hende cu a cumpra un kerstboom y decora nan cas pa pasco ta kita tur adorno y prepara pa celebracion di carnaval. Dia 25 di Januari tur hende ta dedica atencion na e logronan di nos pais Aruba, poniendo atencion special na e logronan di nos libertador Betico Croes. Esaki ta alavez un antesala pa e celebracion di nos Dia di Himno y Bandera na maart, caminda tur atencion ta pa nos cultura di Aruba.

Despues di esaki ta bin Celebracion di Año di La Reina cu enfoke riba deporte y nos weganan popular y na Juni celebracion di Dera Gai. Na Oktober tin celebracion di Dia de la Raza cu e Feria Multi-Cultural di Aruba, caminda cultura di tur pais cu tin decendiente na Aruba, hunto cu Arubianonan ta haya oportunidad di presenta nan cultura na e pueblo di Aruba. Finalmente ta clausura e año cu celebracion di fiestanan di Fin di Año, entre otro cu e Festival di Musica di Fin di Año y Festival di Dande. Nos por mira cu cada epoca tin su celebracion y cada celebracion tin su aspecto tipico, su musica y trahe cu ta identifica e celebración, pero cu alavez ta distingui cada evento cultural y cada epoca for di otro.

Luna di Cultura

E año aki Ministerio di Labor, Cultura y Deporte a tuma e iniciativa pa anuncia luna di Maart como e luna di cultura di Aruba. Esaki ta significa cu a haci un apelación na pueblo di Aruba en general pa dedica atencion durante e luna di Maart na tur loke ta cultura tipico di Aruba, nos tradicionnan tipico cu poco poco ta bay perdi y alavez atencion special na nos Himno

y Bandera. Un acontecimiento special cu ta tuma lugar den luna di Maart ta e hecho cu 27 di Maart ta Dia Internacional di Teatro. Ya pa tres año consecutivo e Seccion di Teatro di Instituto di Cultura ta duna homenahe na un persona of grupo di e mundo teatral di Aruba cu a duna un aporte nacional na desaroyo di teatro. Den e luna aki tambe ta celebra Dia Internacional di Poema dia 21 di Maart. Esaki ta un dia cu na Aruba ta duna atencion special na nos poetanan, pero tambe na poema publica den nos idioma Papiamentu, un herencia cultural di Aruba, Bonaire y Curaçao.

Parada Cultural di Aruba

Un Parada Cultural di Aruba ta duna oportunidad pa pone atencion special na tur loke ta nos cultura y tradicionnan tipico. Esaki ta significa cu por desaroya e Parada di Cultura di Aruba di tal forma cu e ta bira un evento cultural importante den e concientizacion di nos pueblo, nos hubentud, nos habitantenan stranhero y tur bishitante riba loke ta di nos cultura tipico y di nos historia tipico di Aruba.

E interes cu e pueblo di Aruba a muestra e año aki pa tanto participa como bay mira e Parada di Cultura di Aruba ta muestra cu nan kier bay waak un parada unico, un parada cu ta otro di tur loke cu nos conoce caba. Den e Parada di Cultura di Aruba por muestra tur loke na prome luga ta identifica nos cultura, tradicion, musica y bailenan tipico y na di dos luga tur loke ta relaciona cu nos himno y bandera. No ta e intencion pa ripiti musica di carnaval y trahe di carnaval den un Parada Cultural. Esaki por significa den futuro cu e Festival di Himno y Bandera lo por haya un rol importante den e Parada di Cultura di Aruba. Mescos cu den carnaval di Aruba e roadmarch y calypso ganado ta e musica cu ta guia e parada di carnaval, mescos e cancionnan ganado di Festival di Himno y Bandera, hunto cu composicionnan tanto tipico, como cu un mensahe special riba nos identidad, por desaroya como e musica cu ta bay guia e Parada di Cultura di Aruba. E año aki e cancion cu ta resona "Solo lo lo briya" di Etty Toppenberg, tabata un cancion masha bon mes scogi pa Stimami Band. E Parada di Cultura di Aruba, por fungi como anfitrión caminda tur grupo y school di baile di Aruba cu ta balia bailenan tipico ta

expone nan trahe y nan bailenan den un parada. Gruponan tipico y caha di orgel di Aruba por participa den e parada aki pa compaña diferente grupo. Tabata un sensacion pa mira con caha di orgel "Nos Cultura" a compaña e grupo Teatral Contemporaneo. Aruba tin diferente grupo tipico manera Grupo di Betico, Tipico Pegasaya y Grupo Sodo y Cuero cu por guia e parada den 2008 y asina destina nos Parada di Cultura di Aruba na nos musica y bailenan tipico y autentico. E team organizado lo bay sigui planea e actividad aki mas mihor ainda, ya cu año 2008 ta e Año Nacional di Cultura na Aruba. For di awor caba ta haci un apelacion na tur participante di Festival di Himno y Bandera pa pensa riba e Parada di Cultura di Aruba ora nan ta compone nan cancionnan. Ta bon pa realiza cu un wals y un dansa tambe ta fit bon bon den e parada aki. Un invitacion ta bay tambe na tur grupo di baile pa participa otro año, pa demostra loke nan tin di ofrece e pueblo di Aruba riba tereno di baile tipico. E año aki e grupo di Lia Lopez a muestra por ehempel con por combina un trahe di baile cu un fantasia di colornan di e bandera di Aruba. Importante ta pa evita cu e parada ta bira un di dos carnaval di Aruba. Mescos e NO mester bira un di dos fiesta di Dera Gai, e NO mester bira un DEFORMACION di nos tradicionnan. Parada di CULTURA DI ARUBA, simplemente mester enfoca y concientiza e pueblo di Aruba riba tur loke ta NOS MUSICA, CANCION, BAILE Y TRAHE TIPICO DI ARUBA. Combina cu atencion special na nos himno y bandera. E Parada di Cultura di Aruba, ta algo cu por compara cu e Parada di Seu na Corsou, cu a desaroya bira un evento nacional y awor ta tambe un atraccion turistico. Na Aruba nos tin e oportunidad di crea un iniciativa nobo, sin kita un exprecion cultural tradicional for di su contexto. Nos tin e oportunidad di combina nos cultura tipico hunto cu exprecionnan contemporaneo basa riba uso di e colornan di nos bandera, manera tabata e caso e año aki tambe cu e trahe di Grupo Teatral Contemporaneo bailando riba tono di musica di caha di orgel. Ministerio di Cultura ta invita henter pueblo di Aruba pa ban crea algo unico. Ban crea un Parada di Cultura di Aruba, pa stimula y promove e cultura tipico di Aruba na prome lugar.

